



Heinrich Thies 85 Jahr

Wi graleert uns Maat Heinrich (Hein) Thies to'n 85. Geburtsdag, den he an'n 25. Januar fiern kunn. In ganz Norddütschland is he bekannt worrn dörch sien spraakpolitisch Engagement, dat em vele Johren in Gang holen hett. So weer he düchtig mit dorbi, de nedderdütsche Spraak dörch dat Anmellen bi de „Europäische Charta der Regional- un Minderheitensprachen“ Stütt to geben. In Sleswig-Holsteen hett he dorför sorgt, dat dat Ortsschiller in twee Spraken geben deit. Un jümmers weer he dor achteran, dat Politikers sik för de plattdütsche Spraak insett hebbt. Vele Johren hett Heinrich Thies ok dat Leit vun de Fehrs-Gill hatt.

Wat aver de mehrsten Lüüd kennen doot, dat is de SASS, dat plattdütsche Wöörbook. Hein Thies is de, de dat vun Oplaag to Oplaag jümmers grötter warrn lett un de en plattdütsch Grammatikbook dorto maakt hett. Un dat, ofschoonst he eigentlich Jurist un keen Spraakwetenschopper is.

So wichtige Böker, de mööt hüüttdaags ok in't Internet to finnen sien. Dat ümtosetten, dat weer dat grote Projekt för em in de verleden Johren. Mit de Grammatik güng dat teemlich gau, man dat Online-Wöörbook, dat weer en Mammutprojekt, wat veel Tiet (un Geld!) kost hett. In'n Harvst 2022 weer dat endlich sowiet: Heinrich Thies kunn tosamen mit siene Mitstrieders Manon Hansen un Johann Martin Frahm kunddoon: De SASS is online! Ünner de Adress sass-platt.de sünd nu all de Hölpsmiddel to finnen, de een för en modern Spraakbruuk hebben mutt. Jümmerhen steiht de SASS för en vun de gröttsten plattdütschen Spraakrebeden, dat Noordneddersassische.

Liekers he siet en poor Johren böös krank is, warkelt Heinrich Thies jümmers wieder an siene SASS-Projekten: Dat Online-Wöörbook bruukt alltiets Stütt un dat schall noch en plattdütsch Rechtschrievhölp för dat Textprogramm Word geven. He hett noch veel vör – allens Gode!

Volker Holm